

Ellu

Maria Stevana Sammarcelli

L'ultimi razi di sole si facianu vede, l'orizzonte era d'un aranciu rusinu cum'è mai ùn l'aghju vistu è a luna venia à infattà u sole chì pianu pianu si ne ciuttava. L'orizzonte ghjera à perdita di vista, fine, ùn ci n'era. In giru à mè, ùn ci eranu chè colori chì riscal-lanu u core, è purtante, in mè tuttu ghjera ghjalatu. Qualcosa mi mancava. U rimore di u fiume ghjera carcu di sensu, paria ch'ellu mi rigalava note di musica cum'è s'ellu capia u mo dolore. Tandù, chjudiu l'ochji è mi perdiu. Mi perdiu in i mio sogni, in i mio ultimi ricordi chì per sempre m'avianu marcatu. I ricordi, ghjera tuttu ciò chì mi fermava. Cio ch'avia di più preziozu. U ricordu di a nostra vita cumuna mi tenia caldu i ghjorni di friscura chì ciò chì hè accadutu ghjera sinceru, veru, firmava cum'è una candela chì mi ferà lume in mumentu oscuri, è mai ùn si spengherà. M'ar-ricurdava di a dolcezza di i so gesti chì m'assicuravanu, u gustu di e so labre chì m'avianu imbroicata. U so profumo ghjera stampatu in mè per l'eternità è mai ùn aghju pussutu ritruvalli in qualchissia d'altu.

U ricordu di sta persona mi vultulava u core, l'aghju ammiratu in u passatu è ancu amatu. Pudia induvinà e mo pensate e più alluntanate è i mio sogni i più secreti. Una volta ch'ellu era entratu in a vostra vita ghjera cum'è una malatia, ùn vi chitava veramente. Aghju cridutu, più d'una volta, sculunallu per ste strette, sente u so profumo chì m'avia tantu marcatu, ricunnosce u so risu chì tempi fà m'avia resu innamorata. Quand'ellu ridia, a dolcezza si facia vede nant'à a so faccia, i so ochji, culor di celu lucianu più chè e stelle è vi facianu scurdà di tuttu, di tuttu for di ellu...

L'aghju cercu per ogni lochi, senz'arrestu, l'aghju cercu senza truvallu. Si dice chì quandu si parte si more un pocu, ma, per ellu ùn hè vera...

I mio ricordi d'ellu eranu sempre vivi, campava in a mo mente, in u mo core. Puru s'ellu avia lasciatu a mo anima abbughjata a so persona pichjava sempre lu mio core, ghjera luntanu da mè ma in u mo spiritu firmava sempre. U mo sguardu, più bella meraviglia chè ellu ùn averà cunnisciutu è dapoi quellu ghjornu ùn luce più, ghjè biotu. Avia bisognu d'ellu, ma ellu nò. Mi dumandu spessu s'ellu pensa a mè per mumentu cum'è eiu pensu à ellu? Piglierà u tempu di guardà ritratti di noi? L'accaderà di viaghjà in i so ricordi? I nostri ricordi? di pensà à ciò che no eramu? Tante questione chì fermanu senza risposta...

Oramai, omu ùn hà u tempu. E ci hè st'impressione chì a vita fila è trapoghja cum'è u ventu. Un si piglia u tempu di calassi nantu à un bancu, di guardà a natura, di parlà à una persona scunnisciuta, a terra gira troppu in furia, u sole si chjina prestu prestu. I zitelli correnu per ghjucà, i grandi correnu per travaglià. Ùn pigliemu micca u tempu di cuntemplà u mondu a l'ingiru, a ghjente à l'intornu, di campà, di tene caru, di profittà, di scopre l'altu. Allora mi diciu chì aghju avutu a furtuna d'amparà à cunnoscelu, di sparte incù ellu è di vede ciò ch'ella hè veramente di campà una vita cumuna.

A verità ghjè quessa: sò sola. sò sola, invece chì nanzu, ghjeramu dui. È allora, mi sò detta quessa, simu innamorati più d'un'illusione chè d'un essere, è à rombu di corre appressu à st'illusione mi sò persa in viaghju à a vitezza di a vita.